

REGIONAL NEWS UNIT  
ALL INDIA RADIO, AGARTALA  
Date: 26-07-2024  
Time: 07.20-07.25 AM Hrs  
BENGALI MORNING BULLETIN

---

**Panchayat Election :**

রাজ্যে ত্রিস্তর পঞ্চায়েত নির্বাচনে মোট ৬৯০৯টি আসনের মধ্যে নির্বাচন অনুষ্ঠিত হবে ২১০৩টি আসনে। বাকি ৪৮০৬টি আসনে বিজেপি প্রার্থীরা বিনা প্রতিদ্বন্দ্বিতায় জয়ী হয়েছেন। এর মধ্যে ৬০৬ টি গ্রাম পঞ্চায়েতের মোট ৬৩৭০টি আসনের মধ্যে ৪ হাজার ৫৫১টি আসনে বিজেপি প্রার্থীরা বিনা প্রতিদ্বন্দ্বিতায় জয়ী হয়েছেন। এর ফলে গ্রাম পঞ্চায়েতের ১৮১৯টি আসনে নির্বাচন অনুষ্ঠিত হবে। ৩৫টি পঞ্চায়েত সমিতির মোট ৪২৩টি আসনের মধ্যে ২৩৫টি আসনে বিজেপি প্রার্থীরা বিনা প্রতিদ্বন্দ্বিতায় জয়ী হয়েছেন। নির্বাচন অনুষ্ঠিত হবে পঞ্চায়েত সমিতির ১৮৮টি আসনে। আটটি জিলা পরিষদের মোট ১১৬টি আসনের মধ্যে কুড়িটি আসনে বিজেপি প্রার্থীরা বিনা প্রতিদ্বন্দ্বিতায় জয়ী হয়েছেন। এর ফলে জিলা পরিষদ নির্বাচন অনুষ্ঠিত হবে বাকি ৯৬টি আসনে। রাজ্য নির্বাচন কমিশন সূত্রে প্রাপ্ত সর্বশেষ তথ্য অনুযায়ী, গ্রাম পঞ্চায়েত নির্বাচনে মোট সাতটি ব্লকে বিজেপি প্রার্থীরা সবকটি আসনে বিনা প্রতিদ্বন্দ্বিতায় জয়ী হয়েছেন। ৩৫টি পঞ্চায়েত সমিতির নির্বাচনে তেরোটি ব্লকের সবকটি আসনে বিজেপি প্রার্থীরা বিনা প্রতিদ্বন্দ্বিতায় জয়ী হয়েছেন।

\*\*\*\*\*

**Kerosene :**

বিগত কয়েক মাস যাবৎ পেট্রোলিয়াম ও প্রাকৃতিক গ্যাস মন্ত্রণালয় অন্যান্য রাজ্যের মতো ত্রিপুরা রাজ্যেও ত্রৈমাসিক কেরোসিনের কোটা ৩৫১৪ কিলোলিটার থেকে কমিয়ে জুলাই-সেপ্টেম্বর পর্যন্ত ১৪২৮ কিলোলিটার কেরোসিন বরাদ্দ করেছে। এর ফলে রাজ্য সরকার কর্তৃক গণবন্টন ব্যবস্থায় জুলাই থেকে সেপ্টেম্বর এই তিনমাস পর্যন্ত মাথাপিছু ৩৬০ মিলিলিটার করে কেরোসিন বরাদ্দ করা হয়েছে। খাদ্য, জনসংভরণ ও ক্রেতাস্বার্থ বিষয়ক দপ্তর থেকে এই সংবাদ জানানো হয়েছে।

\*\*\*\*\*

#### **Training of Panchayet election :**

ত্রিস্তর পঞ্চায়েত নির্বাচন উপলক্ষে গতকাল মোহনপুর ব্লকে ভোটগ্রহণ কর্মীদের মহড়া অনুষ্ঠিত হয়। মোহনপুর দ্বাদশ শ্রেণী বিদ্যালয়ে অনুষ্ঠিত এই মহড়ায় উপস্থিত ছিলেন মোহনপুর ব্লকের বিডিও তথা রিটার্নিং অফিসার ধৃতিশেখর রায়। মহড়ায় রিটার্নিং অফিসার রাজ্য নির্বাচন কমিশনের নির্দেশিকাগুলি ভোটগ্রহণ কর্মীদের নিকট তুলে ধরেন। ৭১৭ জন ভোটগ্রহণ কর্মী, ১১ জন সেক্টর অফিসার, ৫ জন এআরও এদিন উপস্থিত ছিলেন। ত্রিপুরা কৃষি কলেজের সহকারি অধ্যাপক ড. সৌরভ দাস, মান্দাই আর ডি ব্লকের অতিরিক্ত বিডিও পূজন সেন সহ অন্যান্যরা মহড়ায় ভোটগ্রহণ কর্মীদের প্রশিক্ষণ দেন।

\*\*\*\*\*

#### **Community Radio :**

কেন্দ্রীয় তথ্য ও সম্প্রচার মন্ত্রী অশ্বিনী বৈষ্ণব গতকাল তথ্য ও সম্প্রচার প্রতিমন্ত্রী ড. এল. মুরুগান এবং মিজোরামের মুখ্যমন্ত্রী

লালদুহোমার উপস্থিতিতে ভিডিও কনফারেন্সের মাধ্যমে ভারতের ৫০০ তম কমিউনিটি রেডিও স্টেশনের উদ্বোধন করেছেন। এই স্টেশন, আপনা রেডিও ৯০.০ এফএম, ইন্ডিয়ান ইনস্টিটিউট অফ ম্যাস কমিউনিকেশন, আইজল দ্বারা পরিচালিত একটি স্টেশন। উদ্বোধনী ভাষণে শ্রী বৈষ্ণব বলেন যে এই উদ্যোগটি আপনা রেডিও স্টেশনের পরিধির এলাকায় মানুষের জীবনে একটি উল্লেখযোগ্য পরিবর্তন আনবে। অনুষ্ঠানে শ্রী বৈষ্ণব দশম জাতীয় কমিউনিটি রেডিও পুরস্কারের বিজয়ীদের নাম ঘোষণা করেন।

\*\*\*\*\*

**News time :**

শ্রোতাবন্ধুরা। একটি বিশেষ ঘোষণা। অলিম্পিক ক্রীড়া প্রতিযোগিতার ধারাবিবরণী প্রচারের পরিপ্রেক্ষিতে আকাশবাণীর সংবাদ প্রচারের সময়েরও কিছু পরিবর্তন করা হয়েছে। আজ থেকে আগামী ১১ই আগষ্ট পর্যন্ত আকাশবাণী আগরতলা কেন্দ্রের সকালের সংবাদের সময় পরিবর্তন করা হয়েছে। আগামী ১১ই আগষ্ট পর্যন্ত সকাল সাতটা বেজে ৩৫ মিনিটের স্থানীয় বাংলা সংবাদ আপনারা শুনতে পাবেন সকাল ৭:২০ মিনিটে এবং সকাল সাতটা চল্লিশ মিনিটের ককবরক সংবাদ শোনা যাবে সকাল সাতটা বেজে ২৫ মিনিটে।

\*\*\*\*\*

**State prabhari :**

ত্রিপুরা সহ ছয় রাজ্যে দলের প্রভারি নিয়োগ করলেন বিজেপির কেন্দ্রীয় সভাপতি জগত প্রকাশ নাড্ডা। গতকাল বিজেপির সাধারণ

সম্পাদক অরুণ সিং এক বিবৃতিতে জানান, ত্রিপুরার প্রভারি হয়েছেন ডঃ রাজদীপ রায়। ত্রিপুরা ছাড়া আসাম, চন্ডিগড়, লাক্ষাদীপ, রাজস্থান এবং তামিলনাড়ুর প্রভারির নাম ঘোষণা করা হয়েছে। রাজস্থান এবং তামিলনাড়ুর জন্য সহ প্রভারির নামও ঘোষণা করেছেন শ্রী সিং।

\*\*\*\*\*

### **Nipun Tripura**

শিক্ষা সপ্তাহের সাত দিনব্যাপী কর্মসূচির পঞ্চম দিনে আজ রাজ্যের সমস্ত বিদ্যালয়ে থাকবে বৃত্তিমূলক ও তথ্য প্রযুক্তি বিষয়ের উপর আলোচনা। নিপুন ত্রিপুরার দায়িত্বপ্রাপ্ত নোডাল অফিসার অভিজিৎ সমাজপতি বলেন রাজ্যে একইসঙ্গে বুনিয়াদি শিক্ষা দপ্তরের নিপুন ত্রিপুরা শাখার উদ্যোগে এন্ড লাইন অ্যাসেসমেন্ট সার্ভার কাজও চলছে। উল্লেখ্য, এই সার্ভার মাধ্যমে তৃতীয় শ্রেণীতে পাঠরত সমস্ত ছাত্রছাত্রীদের ভাষাগত ও গাণিতিক বিষয়ের মূল্যায়ন করা হবে।

\*\*\*\*\*

### **Maan-Ki-Baat :**

প্রধানমন্ত্রী নরেন্দ্র মোদি আগামী রবিবার সকাল ১১টায় আকাশবাণীর মন-কি বাত অনুষ্ঠানের ১১২তম পর্বে দেশ বিদেশের জনগনের সাথে মত বিনিময় করবেন। এই অনুষ্ঠানটি আকাশবাণী ও দূরদর্শনের সমস্ত নেটওয়ার্ক, আকাশবাণী সংবাদ ওয়েবসাইট [www.newsonair.com](http://www.newsonair.com) ও newsonair mobile app-এ শোনা যাবে। অনুষ্ঠানটি আকাশবাণী, ডিডি নিউজ, প্রধানমন্ত্রীর দপ্তর

তথা তথ্য ও সম্প্রচার মন্ত্রকের ইউ টিউব চ্যানেলেও শুনতে পাওয়া যাবে। অনুষ্ঠানের অব্যবহিত পরেই এর আঞ্চলিক ভাষার অনুবাদ শোনা যাবে। এই আঞ্চলিক ভাষার অনুষ্ঠানটি রাত ৮টায় পুনঃ প্রচার করা হবে।

\*\*\*\*\*

**Biplab kumar Deb :**

সাংসদ বিপ্লব কুমার দেব গতকাল লোকসভায় আগরতলা এমবিবি বিমানবন্দরকে আন্তর্জাতিক বিমানবন্দর হিসেবে ঘোষণার প্রক্রিয়াকে প্রাধান্য দেওয়ার বিষয়ে কেন্দ্রীয় অসামরিক বিমান পরিবহন মন্ত্রীর দৃষ্টি আকর্ষণ করেন। শ্রী দেব বলেন বিমানবন্দরটি আন্তর্জাতিক রূপে স্বীকৃতি পেলে বিদেশী পর্যটকরাও রাজ্যে আসতে পারবেন এবং তা রাজ্যের অর্থনীতিকে সুদৃঢ় করবে। পাশাপাশি তিনি বিমানবন্দরে ইমিগ্রেশন চেকপোস্টের সূচনা করা সহ বিমান বন্দরের পরিচালন ব্যবস্থার অত্যাধুনিকীকরণের বিষয়ে সংশ্লিষ্ট মন্ত্রকের দৃষ্টি আকর্ষণ করেন।

\*\*\*\*\*

**NEET-UG Result :**

ন্যাশনাল টেস্টিং এজেন্সি গতকাল NEET-UG 2024-এর একটি সংশোধিত ফলাফল প্রকাশ করেছে। প্রশ্নপত্রে একটি বিতর্কিত পদার্থবিজ্ঞানের প্রশ্নের সঠিক বিকল্প বিবেচনা করে সংশোধিত ফলাফল ঘোষণা করা হয়েছে। আইআইটি দিল্লির একটি বিশেষজ্ঞ কমিটি বিতর্কিত প্রশ্নের সঠিক বিকল্প হিসেবে ৪র্থ বিকল্পের সুপারিশ করে। ছাত্ররা NTA-এর অফিসিয়াল ওয়েবসাইটে তাদের সংশোধিত স্কোর কার্ড দেখতে পাবেন।

\*\*\*\*\*

**Weather :**

আজ আকাশ সাধারণত মেঘাচ্ছন্ন থাকবে। দু এক জায়গায় হালকা থেকে মাঝারি পর্যায়ে বৃষ্টিপাতের সম্ভাবনা রয়েছে। আজ দিনের তাপমাত্রা সর্বোচ্চ ৩৫ ডিগ্রি সেলসিয়াস এবং সর্বনিম্ন ২৭ ডিগ্রি সেলসিয়াস এর কাছাকাছি থাকবে। আজ ভোরে তাপমাত্রা ছিল সর্বনিম্ন ২৬.৯ ডিগ্রি সেলসিয়াস। আগামী ২৪ ঘন্টায় রাজ্যের সব জেলায় বিক্ষিপ্তভাবে বৃষ্টিপাতের সম্ভাবনার কথা জানিয়েছে আবহাওয়া দপ্তর।

\*\*\*\*\*

\*\*\*\*\*